

## So Manches is ganz anerscht Heit.

Oftmols denk ich mer, liewe Leit;  
So Manches is doch ganz anerscht heit.  
Un so Manches was Frieher e Witz wor geweent;  
Des is in der heidichi Zeit Worheit genn.

Wann mer so e modernes Bild heit g`sieht;  
Vor des hätt ich, in der Schul, e Vierer kriet.  
Der heidichi Kinschtler awer, hat gut abkassiert;  
Er hat jo schließlich och Johrelang studiert.

Wann mer, im Fernseh, die Mode heit g`sieht;  
Dann kenn ich niemand wu so ettwas onzieht.  
Trotzdem sin Die wu des mache beriehm in de Welt;  
Un die was des zeige krien och e dicki Stang Geld.

Haustiere sin heit so e Oort Kinnerersatz;  
Ich red jetz do vu`m Hund un vun de Katz.  
Sie werre geboot, frisiert, sogor Kleider misse se krien;  
E Katz hat e Maus hehschtens im Fernseh mol g`siehn.

Die Jugend hat Ringe in de Nos, un an sunscht manche Stelle;  
Mir han des bei de Schwein gemach, das se net wuhle selle.  
Die neie Hosse han heit schun iwerol Risse;  
Frieher hat mer sowas glei nähe misse.

Na ja, das sich och viel zum Gudi hin verennert hat is gewiß;  
Doch ich menn das viel dervunn och e große Bledsinn is.  
Un wer weiß, vielleicht in Hunnert Johr;  
Hat de Mensch sei Verstand schun ganz verlort!